



Republika e Kosovës
Republika Kosovo-Republic of Kosovo
Kuvendi - Skupština - Assembly

Legjislatura V

Sesioni vjeshtor

Seancë e jashtëzakonshme e Kuvendit

P-079

Prishtinë, më 27 dhe 28 tetor 2016

P R O C E S V E R B A L

**I SEANCËS SË JASHTËZAKONSHME TË KUVENDIT TË REPUBLIKËS SË
KOSOVËS, E MBAJTUR MË 27 DHE 28 TETOR 2016**

Seancën e drejtoi Kadri Veseli, kryetar i Kuvendit, i ndihmuar nga nënkryetari i Kuvendit, Sabri Hamiti.

Kryetari i hapi punimet e seancës së jashtëzakonshme të Kuvendit të Republikës së Kosovës sipas rendit të ditës të përgatitur nga Kryesia e Kuvendit, në mbledhjen e mbajtur më 26 tetor 2016.

Ai procedoi me pikën e vetme të rendit të ditës:

1. Debat parlamentar për vlerat e UÇK-së në raport me situatën e krijuar

Kryetari i njoftoi deputetët se grupi prej 45 deputetëve nga grupe të ndryshme parlamentare kanë parashtruar kërkesë për seancë të jashtëzakonshme për të debatuar për vlerat e UÇK-së në raport me situatën e krijuar.

Kryetari e ftoi kryetarin e GP të PDK-së që në emër të 45 deputetëve të Kuvendit, parashtrues të kërkesës për debat parlamentar, ta marrë fjalën.

Kryetari i GP të PDK-së, Zenun Pajaziti, në emër të 45 deputetëve e paraqiti dhe e arsyetoi kërkesën për debat parlamentar për vlerat e UÇK-së në raport me situatën e krijuar. Ai kërkoi unitet nga deputetët e Kuvendit në qëndrimet e tyre rreth vlerave sublime të luftës së UÇK-së, si nxjerrjen e një rezolute të përbashkët sa i përket mbrojtjes së vlerave kombëtare. Diskutimi i z. Pajaziti është dhënë në transkript.

Pastaj, kryetari e hapi debatin parlamentar për vlerat e UÇK-së në raport me situatën e krijuar.

Lidhur me vlerat e UÇK-së në raport me situatën e krijuar diskutuan: Ismet Beqiri, në emër të Grupit Parlamentar të LDK-së; Rexhep Selimi, në emër të Grupit Parlamentar të LV-së; Pal Lekaj, në emër të Grupit Parlamentar të AAK-së; Zafir Berisha, në emër të Grupit Parlamentar “Nisma”; Mufera Shinik, në emër të Grupit Parlamentar “6+”; zëvendëskryeministri Hajredin Kuçi, në emër të Qeverisë së Kosovës; Kadri Veseli, kryetar i Kuvendit, ministri Arsim Bajrami, si dhe deputetët: Anton Quni, Glauk Konjufca, Time Kadrijaj, Haxhi Shala, Daut Haradinaj, Donika Kadaj-Bujupi, Xhevahire Izmaqi, Fisnik Ismajli, Bekim Haxhiu, Fatmir Limaj, Shaip Muja, Fisnik Ismajli, Hajdar Beqaj, Albin Kurti, Ali Berisha, Ganimete Musliu, Teuta Haxhiu, Shukrije Bytyçi, Elmi Reçica, Avdyli Ymeri, Bali Muharremaj, Nuredin Ibishi, Selviqe Halimi, Luljeta Veselaj-Gutaj, Blerta Deliu-Kodra, Gëzim Kelmendi, Safete Hadërgjonaj, Bislim Zogaj, Shukri Buja, Mexhide Mjaku-Topalli, Naim Fetahu, Sala Berisha-Shala, Nait Hasani, Agim Çeku, Nezir Çoçaj, Salihe Mustafa dhe Agim Aliu, diskutimet e të cilëve janë dhënë të plota në transkript.

* * *

Pas këtyre diskutimeve, deputeti Elmi Reçica, në emër të grupeve parlamentare të PDK-së, LDK-së, AAK-së, “Nismës” dhe GP “6+”, e paraqiti Propozim-rezolutën prej 12 pikave.

Lidhur me Propozim-rezolutën e paraqitur nga z. Reçica diskutuan: Zenun Pajaziti, Salih Salihu, Glauk Konjufca, Pal Lekaj dhe Bislim Zogaj.

Meqë nuk kishte unifikim të qëndrimeve nga të gjitha grupet parlamentare, Kryetari e mbylli seancën e sotme në orën 21:25, për ta vazhduar të nesërmen, më 28 tetor 2016, në orën 10:00.

*Vazhdim i punimeve të seancës së jashtëzakonshme
E premte, më 28 tetor 2016, ora 10:00.*

Seancën e kryesoi Kadri Veseli, kryetar i Kuvendit.

Kryetari e ftoi z. Zenun Pajaziti, kryetar i GP të PDK-së, që para deputetëve ta paraqesë tekstin e harmonizuar të Propozim-rezolutës për miratim.

Kryetar i GP të PDK-së, Zenun Pajaziti, e paraqiti tekstin e Propozim-rezolutës, të harmonizuar nga grupet parlamentare: PDK, LDK, AAK, “Nisma” dhe “6+”.

Kryetari fillimisht e hodhi në votim Propozim-rezolutën.

Rezultati i votimit ishte si në vijim:

Për -----	61
Kundër -----	0
Abstenime -----	11

Kryetari konstatoi se Kuvendi me shumicë e miratoi këtë:

REZOLUTË

1. Lufta çlirimtare e Kosovës, e udhëhequr nga Ushtria Çlirimtare e Kosovës, me qëllim të çlirimit të Kosovës dhe sjelljes së lirisë dhe pavarësisë për popullin e Kosovës, me karakter mbrojtës dhe çlirimtar, duke e respektuar të drejtën dhe standardet më të larta të luftës, e drejtuar ekskluzivisht kundër forcave ushtarake e policore dhe administratës okupuese të Serbisë në Kosovë, është lufta e armatosur e popullit të Kosovës, e cila mbrohet dhe çmohet nga çdo qytetar dhe institucion i Republikës së Kosovës;
2. Pjesëtarët e Ushtrisë Çlirimtare të Kosovës, me sakrificën, angazhimin dhe kontributin e tyre të çmuar, në luftën çlirimtare të Kosovës, ishin faktorë vendimtarë për sjelljen e lirisë dhe pavarësisë për popullin e Kosovës dhe në këtë drejtim gëzojnë dhe duhet të gëzojnë mbështetjen dhe vlerësimin e tyre të merituar institucional, në pajtim me Kushtetutën dhe legjislacionin në fuqi;
3. Republika e Kosovës është e përkushtuar për krijimin e një shteti të qytetarëve të barabartë, i cili do t'i garantojë të drejtat e secilit qytetar, liritë qytetare dhe barazinë e të gjithë qytetarëve para ligjit, dhe në këtë drejtim çdo tendencë e kujtqo qoftë që ndaj pjesëtarëve të Ushtrisë Çlirimtare të Kosovës të ndërmarrë masa që janë në kundërshtim me parimet e Kushtetutës së Republikës së Kosovës dhe ligjeve të saj në fuqi dhe për motive jashtë sistemit të drejtësisë, janë të papranueshme;
4. Sikur çdo qytetar i Republikës së Kosovës, edhe pjesëtarët e Ushtrisë Çlirimtare të Kosovës i kanë të drejtat dhe liritë themelore të garantuara me Kushtetutë, dhe këto të drejta mund të kufizohen vetëm me ligj dhe vetëm deri në atë masë sa është e domosdoshme që në një shoqëri të hapur dhe demokratike të përmbushet qëllimi për të cilin lejohet kufizimi;
5. Kufizimet e të drejtave dhe lirive themelore të garantuara me Kushtetutë, sikur për çdo qytetar të Republikës së Kosovës, ashtu edhe për pjesëtarët e Ushtrisë Çlirimtare të Kosovës nuk mund të bëhen për qëllime të tjera, përveç atyre për të cilat janë përcaktuar;
6. Kufizimi i të drejtave dhe lirive të garantuara me Kushtetutë nuk bën ta mohojë kurrësi esencën e së drejtës së garantuar. Edhe me rastin e dënimeve të Grupit të Drenicës i ftojme të gjitha institucionet e pushtetit publik dhe sidomos gjykatat që t'i kushtojnë kujdes esencës së të drejtës që kufizohet, rëndësisë së qëllimit të kufizimit, natyrës dhe vëllimit të kufizimit, raportit midis kufizimit dhe qëllimit që synohet të arrihet, si dhe ta shqyrtojnë mundësinë e realizimit të atij qëllimi me kufizim më të vogël;
7. Ushtrimi i autoritetit publik në Republikën e Kosovës bazohet në parimet e barazisë para ligjit të të gjithë individëve dhe në respektimin e plotë të të drejtave dhe lirive themelore të njeriut, të pranuar ndërkombëtarisht, në këtë drejtim edhe në mbrojtjen e pjesëtarëve të Ushtrisë Çlirimtare të Kosovës;

8. Të drejtat dhe liritë e njeriut, të garantuara me Kushtetutë dhe me legjislacionin në fuqi në Republikën e Kosovës, duhet të zbatohen edhe për ushtarët e Ushtrisë Çlirimtare të Kosovës;

9. Pjesëtarët e Ushtrisë Çlirimtare të Kosovës kanë të drejtë për gjykim të drejtë dhe të paanshëm dhe sikur çdo qytetari tjetër u garantohet mbrojtje e barabartë e të drejtave në procedurë para gjykatave, organeve të tjera shtetërore dhe bartësve të kompetencave publike;

10. Të gjitha institucionet dhe qytetarët e Republikës së Kosovës duhet t'i ndërmarrin të gjitha masat e nevojshme në pajtim me Kushtetutën dhe legjislacionin në fuqi për t'i mbrojtur pjesëtarët e Ushtrisë Çlirimtare të Kosovës që mund t'u nënshtrohen veprimeve diskriminuese, si rrjedhojë e të qenët pjesëtar i Ushtrisë Çlirimtare të Kosovës;

11. Kuvendi i Republikës së Kosovës u propozon institucioneve të përcaktuara me Kushtetutë që t'i dekorojë për merita të veçanta komandantët dhe ushtarët e Ushtrisë Çlirimtare të Kosovës në pajtim me Ligjin për dhënien e dekoratave;

12. Kuvendi i Republikës së Kosovës zotohet që brenda 6 (gjashtë) muajve do ta miratojë Ligjin për mbrojtjen e vlerave të Ushtrisë Çlirimtare të Kosovës dhe të luftës së saj për çlirim.

Më pas, kryetari i GP të Lëvizjes “Vetëvendosje”, z. Glauk Konjufca, e paraqiti një version tjetër të Propozim-rezolutës me 4 (katër) pika dhe kërkoi që e njëjta të hidhet për votim.

Kryetari tha se Propozim-rezoluta e paraqitur nga kryetari i GP të Lëvizjes “Vetëvendosje” nuk mund të hedhet në votim, ngase e njëjta nuk është në përputhje me nenin 52 të Rregullores së Kuvendit.

Kryetari i mbylli punimet e seancës së jashtëzakonshme në orën 10:55 minuta.

Kryetari i Kuvendit:

Kadri VESELI

Procesverbalin e hartoi:

Drejtorja për Çështje Plenare dhe Procedurale